



## Timor-Leste Revizaun Nasionál Voluntária Tinan 2019

### RELATÓRIU KONA-BA

### IMPLEMENTASAUN OBJETIVU

### DEZENVOLVIMENTU SUSTENTAVEL

## Mensajen prinsipál sira atu submete ba Departamentu kona-ba Asuntu Ekonómiku no Sosiál (DEAS) Nasoins Unidas nian

# 01.

**Konkista sira ne'ebé Timor-Leste halo ona hanesan nasaun ne'ebé foun liu iha Ázia, hetan apoiu husi ninia kompromisu ba rekonsiliaun, inkluziun no demokrasia.** Kore an husi administrasaun koloniál portugeza no okupasaun indonézia nian, nasaun ne'e restaura ninia ukun-rasik an iha tinan 2002, iha momentu ne'ebé buat hotu rahun totál no servisu báziku no instituisaun motuk hotu tanba ema sunu. Nasaun ne'e hala'o ona jornada husi luta traumátika ba ukun-rasik an no períodu ajitasaun sivil no konfliktu atu sai nasaun demokrátika ida, ne'ebé haree liu ba konstrusaun Estadu no ne'ebé aselera progresu iha dezenvolvimentu sustentavel.

# 02.

**Nasaun ne'e defende Ajenda tinan 2030 husi inísiu kedas, hodi suportu objetivu autónomu kona-ba pás, justisa no instituisaun efikás.** Roteiru ODS nian ida, ne'ebé prodús iha tinan 2017, hakerek oinsá meta globál sira aliña ho Planu Dezenvolvimentu Estratéjiku (2011-2030). Kompromisu nasaun nian ba pás, inkluziun no instituisaun-efikás sai hanesan baze hodi alkansa ODS hotu-hotu. Timor-Leste reafirma ninia lideransa iha ODS 16, hodi halo serbisu ba sosiedade ida ne'ebé pasífika, justa no inkluziva.

# 03.

**Rekonsiliaun no inkluziun, iha Timor-Leste no ho ninia viziñu Indonézia, sai nu'udar prioridade hirak ne'ebé imediata.** Transferénsia sosiál ba veteranu no família kbiit laek sira estabelese sedu tebetebes, hodi garante koezaun sosiál no continuidade pás nian. Maske nune'e, feto, komunidadade rurál, ema (inkui labarik sira) ho defisiénsia kontinua hasoru dezafiu atu hetan asesu ba serbisu dignu, no ba edukasaun no kuidadu saúde ne'ebé iha kualidade.

# 04.

**Nasaun ida-ne'e konsolida daudaun kultura demokrasia nian ida, ne'ebé hala'o tiha ona eleisaun haat ho dame no demokrátiku, dezde restaura filafali ninia independénsia.** Ezisténcia instituisaun independente sira ba direitus umanus, ba anti korrupsaun no ba eleisaun, sai nu'udar progresu importante. Promove desentralizasaun, harii kapasidade institusional no fortalese setór justisa, sei ajuda konsolidasaun pás, promove Estadu Direitu no hadiak akontabilidade.

# 05.

**Nu'udar país iha mundu ne'ebé ninia populasaun foin-sa'e maka barak no setór privadu ne'ebé foin hahú, laiha empregu ne'ebé natoon ba número boot foin-sa'e nian atu tama iha merkadu traballu.** Aproveitamentu husi dividendu demográfiku poténsial sei ezije investimentu iha edukasaun, abilidadade no kria serbisu sira ne'ebé dignu, maibé tenki hamenus mós taxa fertildade nian. Diversifikasaun ekonómika no kriasaun empregu iha setór produtivu sira, hanesan manufatura ne'ebé uza maun-de-obra intesivu, turizmu no agrikultura, sei ajuda haburas ekonomia ne'ebé la'ós mai-husi mina-rai.

# 06.

**Nasaun ne'e halo ona progresu importante iha saúde no edukasaun, setór hirak ne'ebé fundamentál atu dezenvolve kapitál umanu.** Timor-Leste hamenus ona taxa mortalidade inan no oan, livre ona husi póliu, no iha ona dalan atu halakon malária. Iha tempu ne'ebé taxa frekuénsia eskola nian aumenta maka'as, hanesan ba fetu no mós ba mane, asesu ba labarik sira ho defisiénsia nian menus nafatin. Atu prepara foin-sa'e sira ba merkadu traballu nian, presiza tebes atu investe lalais iha ensinu sekundáriu, teníka no ensinu superiór ne'ebé mak iha qualidade.

# 07.

**Kombate taxa nutrisaun-ladi'ak ba labarik no inseguransa ai-han no hadi'a asesu ba bee moos no saneamentu báziku importante tebes no ezije investimentu sustentadu.** Maske labarik barak ne'ebé ninia aas la-tuir ninia otas menus daudaun, número ne'e sei aas. Aselera hadi'a nutrisaun sei halo diferensa boot iha aprendizajen labarik nian no iha produtividade. Progresu iha hadi'a asesu ba bee-moos no saneamentu, hanesan impulsu importante ida mós iha kombate hasoru nutrisaun ladi'ak, konsege ona susesu balun, maibé sei presiza halo buat barak liután atu mantein no aumenta esforsu hirak ne'e.

# 08.

**Nasaun ne'e halo ona progresu kona-ba Fetu ninia representasaun iha Parlamentu Nasionál no iha pozisaun sira-ne'ebé permite fetu sira atu fofidesizaun kona-ba asuntu pás no seguransa nian.** Maibé, tenke tau atensaun boot liután hodi kombate taxa kona-ba violénsia bazeia ba jéneru ne'ebé aas no hasa'e fetu nia kapasidade ekonómika. Hadi'ak fetu nia asesu ba justisa no promove asesu diak-liu ba rai, sei tulun hodi hasa'e progresu iha ODS (Objetivu sira husi Dezenvolvimentu Sustentavel) hotu-hotu.

# 09.

**Timor-Leste hala'o hela poupanza kona-ba reseita sira ne'ebé maihusi rekursus naturais hanesan petróleu no gás ba jersaun aban-bainrua nian liuhusi Fundu Petrolíferu, fundu soberanu ida.** Nasaun ne'e uza ona orsamentu husi fundu ne'e hodi halo investimentu iha infraestruturas, fornese eletrisidade no reabilita dalan-aat sira. Timor-Leste sei garante mós katak orsamentu ne'ebé foti iha loron aban-bainrua sei investe iha área estratéjika sira ne'ebé promove kreximentu – hanesan kapitál umanu no diversifikasaun ekonómika – ne'ebé sei tulun atu hamenus dependénsia ba reseita husi mina-rai.

# 10.

**Nu'udar Estado Illa Ki'ik ne'ebé iha Dezenvolvimentu nia laran (SIDS, sigla iha lian inglés), investimentu ne'ebé tahan hasoru klima no promove adaptasaun ho klima ne'e, krusiál tebetebes ba sustentabilidade no reziliénsia ambientál.** Timor-Leste fiar katak asaun globál ba kombate mudansa klimatika ne'e presiza tebetebes, no Timor-Leste mós fó apoiu ba lideransa ne'ebé SIDS hatudu ona, liuliu, iha área enerjia renovavel nian.

# 11.

**Iha faze crítica konstrusaun Estado nian ida-ne'e, importante tebetebes ba Timor-Leste atu aproveita didi'ak parseria sira no fó valór, ho kuidadu didi'ak, ba rekursu nasional no internasionál sira, hodi finansia dezenvolvimentu sustentavel.** Ho nivel reseita públika ne'ebé ki'ik tebetebes, no asisténsia dezenvolvimentu husi rai-li'ur ne'ebé kuran ba daudaun, nasaun ne'e presiza duni forma finansiamentu foun ida, teknolojia, kooperasaun súl-súl no apoiu tékniku.